

పాలు కొరిందియులుకు రాసిన రెండో పత్రిక పాలు కొరిందియులుకు రాసిన దీటో పత్రిక అగరో కొత

2 కొరిందియులు అపొస్తలు పాలు సంగరె రాసిపించికిరి అచ్చి యడ సుమారు 55-56 బొచ్చొరొనె క్రీస్తు జొర్నెలా తరవాత రాసికిరి అచ్చి 1:1 పాలు కొరిందిరె చర్చికు రాసిన దీట లేకకు యెడ దీటొరొ పాలు యెడ అగరె కొరిందియులుకు కఱినమైల లేకలు రాసిసె బులి పండితులు నమ్ముసె 2:3-4; 2 రె సుచించిల లేకరె పత్రలు అమె పక్కరె నీ పాలు మాసిదోనియారె రొల్లాబెల్లె కొరిందియులుకు బడె రాసికిరి అచ్చి.

యెడ బడె వ్యక్తిగత ఇంక బావొద్వేగ లేక బులి కొరిందియ ప్రత్యేకమైలాట కొరిందిరె చర్చి గురించి తీతుకు దీకిరి తాకు లబించిల బొట్ట నివేదిక గురించి పాలు తా ఆనందం వ్యక్తం కొరిసి. ఏ లేకరె, యెరూసలేమురె విస్వాసులుకు సహాయంకొరితె కడిగిల్లా పలియ సేకరన పాలు సూచనలు దిల్లా విభాగంరె నో నిబందన దీకిరి దిల్లా గురించి వివరనాత్మక బోధన అముకు దిగిదిల్లి చర్చి పొక్కరెదీకిరి కుండె మంది తప్పు అపొస్తలు తాకు సెయ్యె ప్రొత్సహించితె పాలు వ్యతిరేకంగా చర్చిరె కుండె మంది మనమానె సత్రుత్వాకు ఉపయోగించిలి బులి తేలిసిలీసి తంకె పాలురొ అదికారి ఉంపరె అనుమానం వ్యక్తం కొరిలీసి యడ యేసు అపొస్తలుగా తా అదికారి గట్టిగా ధ్రువీకరించితె ప్రేరేపించిసి 2 కొరిందియులు ఆకరురె క్రీస్తు

సంగతీనె

1. పాలు సంగంకు సుబం బులి తా లేకకు ప్రారంభించిలిసి 1:1-7
2. తరువాత పాలు తా ప్రయానం గురించి మార్పు గురించి ఇంక నెడ గురించి తాకు అయిలా నివేదిక గురించి ఇంక తా అగరో లేకల గురించి కొతాలగిసి 1:8-7:16

3. సె తరువాత యెరూసలేమురె విస్వాసుల కోసం పలియ వసూలు గురించి పౌలు సూచనలు దివురొ8:1-9:15
4. ఆకరుకు పౌలు సెయ్యె అపోస్తుడుయిలందుకు గురించి తంకు వాదించిల తరువాత దర్శనం గురించి హెచ్చరిక దివురొ10:1-13:10

¹ పురువు చిత్తమువల్లరె క్రీస్తు యేసురొ అపొస్తులుమైల పౌలుకు, అమె అన్న బయిలా తిమోతికు, కొరింతియరె రొల్ల పురువురొ సంగముకు, అకయరె రొల్ల పురువురె రొల్లలింకు సుబము బులి రాసికిరి అచ్చి.

² అం బోయిలా పురువు దీకిరి ప్రబుయిలా యేసు క్రీస్తు దీకిరి క్రుప సమాదానముకు తొత్తై కలుగుసు గాక.

పౌలు పురువుకు క్రుతజ్ఞతా కొయివురొ

³ కనికరము దిగిదిల్లా బో, సొబ్బి ఆదరనకు అనుగ్రహించిలా పురువు, అమె ప్రబువు యీలా యేసు క్రీస్తు బో యీలా పురువు స్తుతింపబొడిమాసి.

⁴ పురువు అముకు కే ఆదరన దీకిరి ఆదరించిలీసొ, సే ఆదరన సంగరె యెడవనా కొన్డానె రొల్లలింకె యీనెను ఆదరించిలాటకు సక్తి గలిగిలాట యీలవని, సెయ్యె మో కొన్డా సొబ్బిటిరె అముకు ఆదరించిలీసి.

⁵ క్రీస్తురొ కొన్డానె మోవల్లరె క్యాకిరి విస్తరించిలీసెవొ సాకిరాక క్రీస్తుసంగరె ఆదరనంకా అముకు విస్తరించిలీసి.

⁶ అమె కొన్డా పొడినెను తో ఆదరనకోసం రక్సన కోసం పొందుంచొ అమె ఆదరన పొందినెను తో ఆదరన కోసం పొందుంచొ. యే ఆదరన అమె కూడ పొందిలవనా సె కొన్డానె ఓపికదీ సహించితె కార్యసాదకము ఈలవనికిరి అచ్చి.

⁷ తొమె కొన్డానె క్యాకిరి పాలివారైకిరి అచ్చొవొ, సాకిరాక ఆదరన తీకిరి పాలివారైకిరి అచ్చెబులి తెలుసును గనక తొముగురించి మో నిరీక్సన స్తిరమైకిరి అచ్చి.

8 మో జట్టుకారీనెలింకె ఆసియరె అముకు తటస్తింఱిలా కొస్తానె గురించి తొముకు నాతెలిసివురొ అముకు ఇస్థమునీ; సడ కిరబుల్నే అమె జీవింఱుంచొ బుల్లా నమ్మకము నీనన్నా రొల్లపనాక, మో సక్తికి మించిల అత్యదిక బారము వల్లరె క్రుంగిజిల్లింఱి.

9 ఈనె మొర్నొదీకిరి ఉటుదిల్లా పురువు వల్లరె గని, మో సంగరె అమె నమ్మకము నారొల్లపన మొర్నొవూంఱుబులి నిస్సయముగా మో మట్టుకు అముకు కలిగికిరి అచ్చి.

10 సెయ్యె సే గొప్ప మొర్నొదీకిరి అముకు తప్పించిసి, ఇంకా అగురుకంకా తప్పించుసి, ఇంకా అం కోసం ప్రార్థన కొరిలవలరె తొమె కూడ సహాయం కొరితండుకు సెయ్యె ఇంకా అగురుకు తొముకు తప్పించునుబులి తా సంగరె నిరీక్సన గలిగికిరి అచ్చి.

11 సడవలరె బడేమంది ప్రార్థనతీకిరి, అముకు కలిగిలా క్రుపావరము కోసం బడేమంది సంగరె అం వినయమైల క్రుతజ్ఞతలు చెల్లింపబొడిసె.

పాలు తా ప్రనాలికకు మార్చిగీవురొ

12 అం అతిసయం కిడబుల్నె, లొకిక జ్ఞానము అనుసరించికిరి, పురువు గ్రహించిలా పరిసుద్ధతతీకిరి నిస్కాపట్యముతీకిరి పురువురొ క్రుపకాక అనుసరించికిరి లోకంరె సలిలపనికిరి, వినేనముగా తొ పనికిరి సలుంచొబులికిరి, అం మనస్సాక్సి సాక్స్యదీతండుకాక.

13 తొమె చదివిగీకిరి పూర్తిగా గ్రహించిలా సంగితీనె తప్ప, మరికిచ్చిను తొముకు రాసిలనీ చివర జాంక యెడ ఒప్పుగునెబులి నిరీక్సింఱింఱొ.

14 ఈనె అమె ప్రబువైల యేసురొ దినొసంగరె తొమె అముకు కారొ, సాకిరాక అమె తొముకు అతిసయ కారనమైకిరి తాంచొ బులి, తొమె కుండె మట్టుకు అముకు ఒప్పిగీకిరి అచ్చి.

15 ఈనె యే నమ్మిలాటపనికిరి తొముకు దీబొ ఆసీర్వాదము మిల్లాపనికిరి అగరె తొంపక్కుఅయికిరి.

16 తొ పక్కురెదీకిరి మాసిదోనియకు జేకిరి మాసిదోనియదీకిరి ఇంకా తొ పక్కురెయికిరి, తొ సంగరె యూదయకు పొడిదిమ్మంచి బులి మీ బులిగించి.

17 సడకు మియ్యి యాకిరి ఉద్దేసించికిరి నాయికుంటా సలించినా? వై, వై బులికిరి, నీ నీ బులి ప్రవర్తించిమంచిబులి మో ఆలోచనానె దే అనుసారంగా యోచించిలించినా?

18 పురువు నమ్మిదగిలాట గనుక అమె తొముకు కొయిలా వాక్యము వైబులి కొయికిరి నీబుల్లాపనికిరి రొన్నాసి.

19 అం దీకిరి, బుల్నే మో దీకిరి సిల్వాను దీకిరి తిమోతి సంగరె, తొబిత్తరె ప్రకటించిలాట పురువు పో యీలా యేసు క్రీస్తు వై బులి కొయికిరి నీబుల్లలింకె రొన్నింతె గాని సెయ్యె వై బుల్లలింకె అచ్చి.

20 పురువురొ వాగ్దానమూనె కెత్తెయినెను సొబ్బీ క్రీస్తుతీకిరి వైబుల్లాపనాక అచ్చి. గనుక అం ద్వారా పురువుకు మహిమ కలిగితందుకు సడా తా వలరె నిస్సయములైకిరి అచ్చె.

21 తొ దీకిరంకా క్రీస్తురె టారికిరి అచ్చి బులి అముకు స్తిరపరచికిరి అబినేకించిలాట పురువాక.

22 సెయ్యె అముకు ముద్రపొక్కిరి, అం హూదయమురె అముకు ఆత్మ బుల్లా సంచకరువుకు అనుగ్రహించికిరి అచ్చి.

23 తొమంపరె కనికరము కలిగితందుకు మియ్యి ఇంకా కొరింతియకు అయిలాని. మొ పొర్నొసంగరె పురువొ సాక్సిగా లోగిలించి.

24 తొ విస్వాసము ఉంపరె అమె ప్రబువులుబులి యాకిరి కొయిలాని. గాని తొ ఆనందముకు సహకారుగా అచ్చి. విస్వాసము వల్లరాక తొమె టారికిరి అచ్చి.

2

1 ఈనె మియ్యె దుక్కొ దిన్నాసి బులి, మియి దుక్కొసంగరె తొ పక్కరకు బుల్లికిరి అయినాసిబులి మోమట్టుకు మియి నిచ్చయించిగించి.

2 మీయి తొముకు దుక్కము కలిగించినె దుక్కొపొందిలాట తప్ప ఇంక కేసే మెత్తె సంతోసపరిచినారె?

3 మీయి అయిలబెల్లె మెత్తె కావల్లరె మీయి సంతోసం కలిగిమంచెవొ, తంకె వల్లరె మెత్తె దుక్కొ కలిగినాసిబులి ఏ సంగతీనె తొముకు రాసింది. ఈనె మో సంతోసం తొం అల్ల సంతోసం బులికిరి తొం సొబ్బిలింకంపరె నమ్మకం కలిగికిరి యాకిరి రాసింది.

4 తొముకు దుక్కొ కలిగిమంచెబులి నీగాని, తొంబిత్తరె కలిగిలా బడేబూతు ప్రేమకు తొమె, తెలిసిగిమంచెబులి, నిండు స్రమసంగరె మనోవేదన సంగరె బడే కందికుంటా రాసింది.

విరోదీనెకు క్షమించువురొ

5 కేసైనన్నా దుక్కొ కలిగించికిరి రొన్నె, మెత్తె మాత్రము నీ కుండెమట్టుకు తొముకల్లకు దుక్కొ కలిగించికిరి అచ్చి. మీయి విసేసబారము తాంపరె నామోపికిరి ఏ కొత కొయిలింది.

6 సాటకు తొంబిత్తరె బడేలింకు వల్లరె కలిగిలా ఏ సిక్నాక చాలు.

7 ఈనె తొమె ఇంక తాకు సిక్స నాపొక్కిరి క్షమించికిరి అదరించువురొ బొల్ల. గుటెబెల్లె సెయ్యే అత్యధికమైలా దుక్కొరె క్షంగిజివ్వొ.

8 ఈనె తావుంపరె తొం ప్రేమకు దిగదిమ్మాసిబులి తొముకు బతిమాలిగిలింది.

9 తొమె సొబ్బి విసయోనెరె విదేయులైకిరి అచ్చెకీవొ బులి తొం యోగ్యత తెలిసిగిత్తె అగరె రాసింది.

10 తొమె కిర గురించి ఈనెను కాకు క్షమించిలిసావొ మీయి కూడా తాకు క్రీస్తు అగరె క్షమించింది;

11 మీయి కిరైనెను క్షమించికిరి తన్నె సాతాను అంవల్లరె మోసం నాకొరిలపనికిరి, తొం కోసం, సాతాను మాయకొతానె అముకు తెలుసు.

త్రోయరె పాలురొ దుక్కొ

12 క్రీస్తు సువార్త ప్రకటించితె మీయి త్రోయ పట్నముకు అయిలబెల్లె, ప్రబువు మెత్తె పైటి కొరితె బొల్ల అవకాసం దీసి.

13 ఈనె మో బయిలా తీతు మెత్తె నాదిగదిలందరె మో మనస్సురె నెమ్మది నీకిరి తంకె పక్కరె సెలవు కడిగీకిరి సెట్టతీకిరి మాసిదోనియకు బయలుదేరించి.

క్రీస్తురె విజయం

14 అం వల్లరె ప్రతి చోటురె క్రీస్తురొ జ్ఞానము సువాసనకు దిగిపించుకుంటా తావుంపరె అముకు కెబ్బుకు విజయోత్సవము సంగరె ఊరేగించుకుంటా తల్లా పురువుకు స్తోత్రము.

15 రక్సింపబొడితల్లాలింకు నసించిజీతల్లాలింకు అమె పురువుకు క్రీస్తు సువాసన యికిరి అచ్చొ.

16 నసించిలాలింకు మొర్నొర్దమైలా వాసనగా, రక్సింపబొడిలాలింకు జీవార్దమైలా జీవపు సువాసనగా అచ్చొ.

17 ఈనె యే సంగతీనె చాటిలాట కేసే? అమె పురువురొ వాక్యముకు మిసికిరి చెరిపిలా బడేలింకెపనికిరి నీకిరి, నిస్కాపట్యముమైలలింకె పనికిరి పురువు వల్లరె నియమించిలాలింకె బులికిరి, క్రీస్తురొ సేవకునె పనికిరి పురువు అగరె బోదించిలించ్చొ.

3

నో నిబందనరొ సేవకునె

1 అముకు అమాక బుల్లికిరి మెప్పించిగివురొ మొదలు కొరిగిల్లించొనా? కుండిలింకు కావలిసిల పనికిరి తొం పక్కరకు ఈనెను తొం పక్కరతీకిరి ఈనెను, ఉత్తరము పొడిదిప్పురొ అముకు అవసరమునా?

2 అమె ప్రాదయల ఉంపరె రాసికిరి అచ్చొ, మనమనె సొబ్బిలింకె తెలిసిగికిరి చదివిగిల్లించొ అమె ఉత్తరము తొంనీనా?

3 పొత్తోపలక వుంపరెగాని సిరా సంగరె గాని నారాసికిరి మనమారొ ప్రాదయాం బుల్లా పలక ఉంపరె జీవంగలిగిలా పురువురొ ఆత్మ సంగరె, అం పరిచర్య మూలంగా రాసిలా క్రీస్తు ఉత్తరము యికిరి అచ్చొబులి తొమె తెలియపరిచిలీసె.

4 కైంకిబుల్నై క్రీస్తుద్వారా పురువుంపరె అముకు విస్వాసమచ్చి అమె కొయిలించొ.

5 అం వల్లరె కెడైనను ఈలాపనికిరి ఆలోసించితందుకు అం మట్టుకు అమ్మాక సక్తి గలిగిలాలికె నింతో అముకు యే సక్తి పురువుతీకిరి కలిగికిరి అచ్చి.

6 సెయ్యాక అముకు నో నిబందనకు, బుల్నే రాసికిరిరొల్లా దర్మసాస్త్రం నీగని ఆత్మకాక సేవకులైతే అముకు సక్తి దీసి. రాసికిరిరొల్లా దర్మసాస్త్రం మొరుదూసి గని ఆత్మ జీలాపనికిరి కొరుసి.

7 మొర్నొకు కారనమైలా పరిచర్య, పొత్తోనంపరె చెక్కిలా అక్కురాలుకు సంబందించిలాట ఈనెను, మహిమ సంగరె మిసిలాటైసి. సడుకాక మోసే మో ఉంపరె ప్రకాసించితల్లా సే మహిమ తగ్గిజిల్లాట ఈనన్నా, ఇస్రాయేలు తా మోకు దిగినారినె.

8 యాకిరి తన్నుగా ఆత్మసంబందమైలా పరిచర్య కెత్తె మహిమగా రొస్తా?

9 సిక్సావిదికి కారనమైలా పరిచర్య మహిమ కలిగిలాటయినె నీతికు కారనమైనె పరిచర్య కెత్తో అదికమైల మహిమ కలిగిలాటగా రొస్సి.

10 అత్యదికమైలా మహిమ యెడకురొవ్వరో వల్లరె యెడకు అగరె మహిమతల్లాటగా కొరువురో ఈసి. యే వినయంరె మహిమ నీలాపన అచ్చి.

11 నసించిజితల్లాటాక మహిమగల్లాటైనె, టారిలాట ఇంకా బడే మహిమ కలిగిలాటైకిరి తాసి.

12 మెత్తె యే ఆస అచ్చి సాకరాక, బడే ధైర్యముగా కొతలగిలించొ*.

13 తగ్గిజితల్లాట మహిమరొ అంతముకు ఇస్రాయేలు తేరికిరి నాదిగిలాపనికిరి మోసే తా మో ఉంపరె మునుగు పొగ్గిచ్చి సాకిరక అమె నింతో.

14 ఈనె తంకె మనస్సునె కటిసమైజీసె గనక ఆజిజాంక పుర్ననిబందన చదివితల్లాబెల్లె, సడ క్రీస్తురె సేరిపెసెబులి తంకు

* 3:12 ఎ కొతనే సువార్త రాసికిరి అచ్చి

తెలియపర్చిబొడిలాని, సే మునుగాక టారికిరచ్చి.

15 ఆజిజాంక మోసే గ్రందము తంకె చదివిలాబెల్లల్లా మునుగు తంకె మనుసూనంపరె అచ్చి గని

16 “తంకె మనుసూనె ప్రబువాడుకు కెబ్బుకు బుల్లివేయో సెత్తెలె మునుగు కడిపూసి.”

17 ప్రబువాక ఆత్మ. ప్రబువురో ఆత్మ కేటె తాసో సెట్టె స్వాతంత్ర్యం అచ్చి.

18 అమల్లా మునుగు నీలా మోసంగరె ప్రబువురో మహిమకు అద్దం పనికిరి ప్రతివలంపకొరికుంటా, మహిమ తీకిరి బడె మహిమకు పొందికుంటా, ప్రబువురో ఆత్మనంగరె సే పోలికగాక మార్చబొడిలించొ.

4

మట్టి అండినె ఆత్మీయ సంపద

1 ఈనె యే పరిచర్య పొందిలందరె కనికరం పొందిలాల్లింకైకిరి అద్దెర్యం పొడినింతొ.

2 ఈనె కుయుక్తిగా నా సలికుంటా, పురువొ వాక్యమును వచనగా బోదకొయితనా, సత్యమును ప్రత్యక్షపరచిలందరె ప్రతి మనమకు మనస్సాక్సి అగరె అమె పురువు సముకంసంగరె మెప్పించిగీకుంటా, అవమానకరమైలా రహస్య కార్యమునెకు నిరాకించమాసి.

3 అమె సువార్త మరుగుకొరిలపనికిరి ఈనె నసించిలాల్లింకు విసయమురె మరుగుకొరిలాపనచ్చి.

4 పురువురో మూ గలిగిలాటపనా రొల్ల క్రీస్తు మహిమరో దిగిదిల్లా సువార్త ప్రకాసము తంకు ప్రకాసించికుంట నిమిత్తము యే యుగ సంబంధ యీలా లోకొ పురువొ అవిస్వాసులలింకె అమె మనస్సురె అంకికి నాదిగిదెల్లాపని కొరుసి.

5 ఈనె అమె అముకు గురించి, యేసు నిమిత్తము అమె తో పరిచారకులు బులి ప్రకటించిలించొ.

6 మౌద్రెతీకిరి హల్లో ప్రకాసించిమాసి బులి పలికిలా పురువాక తా మహిమ గురించెలా జ్ఞానము యేసు క్రీస్తుదీకిరి బయలుపరిచితె అమె హుదయలురె ప్రకాసించిసి.

7 ఈనెను యే బలాదిక్యము అం వల్లరె నాకలిగిలాపనికిరి పురువురో రొల్లపనా మట్టి అండినై యే సంపద అముకు నీ.

8 క్యాకిరి జెన్నెనూ కొన్టాపొడిలింఱొ ఇరికించలలింకె నింతె; అపాయమురె అచ్చొ కేవలం ఉపాయము నీలలింకె నింతె;

9 చిత్రహింసానె అనుబవించింఱొ గని దిక్కునిలాలింకైకిరి నింతొ. అముకు మరికిరి పొందినె ఈనె నాసనం ఈలానింతొ.

10 యేసు జీవం అం దేరె దిగదిల్లాపనికిరి యేసురో మోర్నొ అనుబవంకు అం దేనె కెబ్బుకు బొయిగిజెల్లింఱొ.

11 క్యాకిరిబుల్నే, యేసురో జీవం కూడ అం మనమరో దేరె దిగదిల్లాపనికిరి, జీకిరి తల్లా అమె కెబ్బుకు యేసు కోసం మొర్నొకు అప్పగింపబొడిలింఱొ.

12 ఈనె అంబిత్తరె మొర్నొకు తొం బిత్తరె జీవముకు పైటి కొరిలీసి.

13 ఈనె “మీ నమ్మించి గనకాక కొతాలగిలింఱొ.” క్రుప బడే మనమానె దీకిరి ప్రజానె పురువురో మహిమ నిమిత్తము క్రుతజ్ఞతాస్తుతులు విస్తరించిలాపనికిరి, సోబ్బి తొం కోసమాక.

14 ప్రబువైలా యేసుకు ఉటదిల్లా యేసు దీకిరి అముకు కూడ ఉటిదీకిరి, తొంసంగరె కూడ తా అగరె టారదూసి బులి తెలిసి, అమె విస్వసించిలింఱొ గనక కొతలగిలింఱొ.

15 ఈనె విస్వసించిలందరె కొతలగించి బులి రాసిలాపనికిరి సే విస్వాసముకు దీకిరి కూడిల ఆత్మగల్లాలింకయికిరి,

విస్వాసం వల్లరె జీవురో

16 ఈనె అమె అద్దెర్యపొడినింతొ; అం పొదరో మొద్రపొ క్రుసింబెజెన్నెనూ, బిత్తరె మొద్రపొ దినెదినె సక్తికు పొందిలింఱొ.

17 ఈనె క్షనమాత్రమాక రొల్లా కుండె స్రమ, సడకు కెత్తొరెట్లునె అదికమైల అద్భుతమైల మహిమకు అముకు సిద్ధం కొరుకుంటా

తల్లీసి. నడ కెబ్బుకు రొల్లా గొప్ప మహిమ సంగరె అనుబవించితల్లా కొన్టానె కిచ్చీనీ.

18 అమె దిగదిల్లాంచకు నాదిక్కుంటా అద్దుస్యమైలాంచ కోసం ఎదురు దిగిలించొ క్యాకిరి బుల్నే దిగదిల్లాంచ కుండె కలోక తాసి. ఈనె నాదిగదిల్లాంచ సాస్వతంగా తాసి.

5

1 బూమి ఉంపరె అం గొరొ, అం దే యీలా యే గొరొ బంగిజిన్నన్నా, పరలోకంరె అత్తోపైటిసికిరి పురువుదీకిరి బందిలాట నిత్యమైకిరి తల్లా గొరొ పరలోకంరె అముకు అచ్చి బులికిరి తెలుసు.

2 అమె దిగంబరులుగా నీకిరి కొన్నానె పిందిగిల్లాపనికిరి దిగదిలించొ. ఈనె పరలోకందీకిరి అయిలా గొరొ ఎడంపరె దరించిగిల్లా గొప్ప ఆస సంగరె ఎడబిత్తరె ఎదురుదిగిలించొ.

3 సే దే దరించిగిల్లా బెల్లే అమె కొన్నానె నీలలింకె పనికిరి తన్నింతొ.

4 అమె యే లోకంరె తల్లా బెల్లే బొతికమైలా దేకు దరించిగిమ్మా గని పరలోకంరె తల్లాబెల్లే పరలోక సాస్వతమైలా దేకు దరించిగికిరి సాస్వతంగా జీలాట పనికిరి మార్పు చెందుంచొ.

5 నడ వల్లరె అముకు సిద్ధపరిచిలాట పురువు; ఈనె సెయ్యె తా ఆత్మ బుల్నే సంచకరువుకు అముకు అనుగ్రహించిలీసి.

6 ఈనె ఏ దే బిత్తరె రొల్లెత్తెకలో ప్రబువుకు దూరుగా అయించొబులి తెలిసికిరి కెబ్బుకు ధైర్యముగలలింకె పనికిరి అచ్చొ.

7 ద్రుష్ట వల్లరె నీకిరి విస్వాసము వల్లరాక సలిగిల్లించొ.

8 యాకిరి ధైర్యము గలిగీకిరి ఏ దేకు సడికిరి ప్రబువు పక్కరె* రొయితై ఇష్టపొడిలించొ.

9 ఈనె నడకు దే బిత్తరె తన్నన్నా దేకు సడిదిన్నన్నా, తాకు ఇష్టులూగ తమ్మాసిబులికిరాక అం లక్ష్మం.

* 5:8 ప్రబువు పక్కరె అర్థం పరలోకము

10 అమల్లా క్రీస్తు న్యాయపీటం అగరె టారిమంచె. కిరుకుబుల్నే ప్రతిజొనె దేసంగరె జరిగించిలా సెడ్డపైటి ఈనన్నా, సడ బొట్ట పైటి ఈనన్నా, నాబొట్టయినెను, తగిలపనికిరి ప్రతిపలం పొందిమంచె.

క్రీస్తు ద్వారా పురువుకు స్నేహితులైవురో

11 ఈనె అం ప్రబువు విసయమైలా డొరొ తెలిసికిరి మనమానుకు ప్రేరేపించిలించొ, అమె పురువుకు ప్రత్యక్షపరబొడిటాలింకైకిరి అచ్చొబులి నమ్మిలించొ. తొం మనుసూనంకా బొల్లె రొమ్మాసి బులి కోరిలించొ.

12 అముకు అమ్మాక తొం అగరె బుల్లికిరి మెప్పించుగిల్లానింతొ గాని, హ్రుదయంరె అతినయంనాపొడికిరి ఉంపరె రూపంరె అతినయపొడిలలింకు ప్రత్యుత్తరం దీతె తొముకు ఆదారము కలిగిమాసిబులి అం వినయంరె తొముకు అతినయ కారనం కలిగించిలించొ.

13 కెడబుల్నే అమె బోడలింకె అయించొనా పురువు నిమిత్తమాక; స్వస్థబుద్ధిగలలింకె అయించొ తొ నిమిత్తమాక.

14 క్రీస్తురొ ప్రేమ అముకు సలిపించిలీసి; క్యాకిరి బుల్నే సొబ్బిలింకె కోసం జొనె మొరిజీసి. సడకు సొబ్బిలింకె మొర్నొరె పాలుపొందిలీసె.

15 జీవించిలలింకె ఇంక అగరె తంకోసం నీకిరి, తంకోసం మొరిజీకిరి బుల్లికిరి ఉటిలాట కోసం జీతె సెయ్యె సొబ్బిలింకె కోసం మొరిజీసి బులి నిచ్చయించిగించొ.

16 ఈనె ఇంక అగురుకు అం దే వల్లరె కాకు ఈనెను తెలిసినీ. అమె క్రీస్తుకు దేరొ రీతిగా తెలిసిగీకిరితన్నె యెడకు అగరె తాకు సాకిరి తెలిసినీ.

17 ఈనె కేసెయినెను క్రీస్తురె రొన్నె సెయ్యె నోస్రుస్తి; పుర్నాట గతించిసి, ఇదిగొ నోట ఈసి.

18 సొబ్బిను పురువు వల్లరాక ఈసి; సెయ్యె అముకు క్రీస్తు వల్లరె తా సంగరె స్రతువుగా రొల్లబెల్లె జట్టుకారీనెగా మార్చిగీకిరి, పరిచర్య అముకు అనుగ్రహించిసి.

19 సడకిరబుల్నే, పురువు తంక అపరాదములుకు తంకె ఉంపరె నామోపుకుంటా, క్రీస్తురె లోకముకు తాసంగరె స్రతువుగా రొల్లబెల్లె జట్టుకారీనెగా మర్చిచిసి వాక్యముకు అముకు అప్పగించిసి.

20 ఈనె పురువు అం దీకిరి వేడిగిల్లాపనికిరి అమె క్రీస్తుకు రాయబారులుగా పురువు సంగరె స్రతువుగా రొల్లబెల్లె జట్టుకారీనెగా మారివాసి బులికిరి క్రీస్తు పక్సముగా తొముకు బతిమాల్గిల్లించొ.

21 కిరుకుబుల్నే అమె తాబిత్తరె పురువు నీతి ఈలాపనికిరి పాపం నాజనిలా తాకు అం కోసం పాపముగా కొరిసి.

6

1 ఈనె అమె తాసంగరె పైటిలింకెయికిరి తొమె పొందిలా పురువు క్రుపకు వ్యర్థము కొరిగిత్తెనాబులి తొముకు వేడిగిలింపి.

2 “అనుకూల సమయంరె
తో ప్రార్థన సునిమి;

రక్సన దినొరె తొత్తె ఆదిగించిబులి” సెయ్యె కొయిలీసి నీనా! ఇదిగొ
వుంచినాక అనుకూలమైలా సమయంరె,
ఇదిగొ ఎడాక రక్సన దినొ.

3 అమె పరిచర్య నింద నాపొడుకుంటా నిమిత్తము కే వినయంరె ఈనెను అనుమానం కిచ్చి నాకలిగించికిరి,

4 ప్రతి వినయంరె పురువొ తాసేవకునె బులి దిగిదీతె స్రమలబిత్తరె ఇబ్బందులురె ఇరుకులురె,

5 మడ్డొనెబిత్తరె చెరసాలబిత్తరె కొలీనెబిత్తరె ప్రయాసముబిత్తరె జాగరములబిత్తరె ఉపవాసములబిత్తరె ఓర్పుగలలింకెపనికిరి,

6 పవిత్రత సంగరె జ్ఞానము సంగరె దీర్ఘసాంతము సంగరె దయసంగరె పరిసుద్ధాత్మవల్లరె నిస్కపటమైలా ప్రేమసంగరె, పురువు పరిచారకులుయికిరి రొయికిరి సొబ్బి స్థితులరె అముకు అమ్మాక మెప్పుపొందిగిలింపొ.

7 సత్యవ్యాకం బోదించిలావల్లరె పురువు బలమువల్లరె నాపొడికుంటా నీతి ఆయుదమునెకు కలిగికిరి కాపాడిగిల్లించొ,

8 గనత గనహీనతా వల్లరె సుక్తిర్తి దుస్కుర్తులవల్లరె, అమె మోసంకొరిల్లలింకె పనికిరి రొయికిరి సత్యవంతునె

9 నాతెలిసిలా పనికిరి రొయికిరి బొల్లకిరి తెలిసిల్లలింకె; మొరిజిల్లలింకె పనికిరి రొయికిరి ఇదిగొ జీకిరి రొల్లాలింకె; సిక్సిపొడిల్లలింకె పనికిరి రొయికిరి మొరిజిలా పనాలింకె;

10 దుక్కిపొడిలాలింకె పనికిరి రొయికిరి కెబ్బుకు సంతోసంచలలింకె పనికిరి; దరిద్రులమైకిరి బడేలింకు పలియతల్లలింకె కలిగించిలాలింకె; కిచ్చి నాతల్లలింకె పనికిరి రొయికిరి సొబ్బి కలిగిలాలింకె, అచ్చి.

11 ఓ కొరిందియులులింకె, పూర్తి సత్య కొతలగిలించొ, అమె హుదయము విసాలంగా అర్థమైలపనికిరి అచ్చి.

12 తొం బిత్తరె అం అంతరంగం ఇరుకుగా నీ గాని, అం అంతరంగం ఇరుకుగా అచ్చి.

13 తొం బిత్తరె అముకుతల్లా అంతరంగం ప్రతిపలముగ తొముకు తొమె హుదయములుకు విసాలపరిచిగెండి తొమె మో పిల్లనెబులి తొసంగరె యాకిరి కొయిలించి.

పొదరెలింకె పైరెపనకు వ్యతిరేకించివురొ

14 తొమె అవిస్వాసిని సంగరె జట్టుగా రొయితనాండి. నీతికి దుర్నితినంగరె కిర జట్టు? హల్లోకు మోదారుకు కిర జట్టు?

15 క్రీస్తుకు సాతాను సంగరె కిర సంబందము? అవిస్వాసిదీకిరి విస్వాసికు జట్టు కిర?

16 పురువురొ మందిరంరె పొదరెలింకెవిగ్రహముల సంగరె కిర జట్టు?

అమె జీవమైలా పురువురొ మందిరం యాకిరి అచ్చి; నడకు పురువు యాకిరి సెలవు దిల్లీసి.

“మియి తంకెబిత్తరె రొయికిరి సంచరించికిరి,

మియి తంకె పురువు యాకిరి రొంచి
తంకె మో ప్రజలైకిరి తాసె.”

17 ఈనె

“తొమె తంకె మొజిరె దీకిరి బయలుకు అయికిరి

వేరుగా రోండి.
అపవిత్రమైలాంచకు సూగిన్నాసి బులి ప్రబువు కొయిలీసి.

18 ఈనె మియి తొముకు చేర్చిగిల్లించి,
తొముకు బో యికిరిఅచ్చి,
తొమె మెత్తె పోనె జ్యోనెయికిరి అచ్చొ బులి
సర్వసక్తియిలా ప్రబువు కొయిలీసి.”

7

1 ప్రియమైల జట్టుకారీనెలింకె, అముకు ఏ వాగ్దానమూనె అచ్చి
సెడకు పురువు డొరొనంగరె పరిసుద్దత్తుకు సంపూర్తి కొరికిరి, దేకు
ఆత్ముకు కలిగిలా సొబ్బి కల్మసము దీకిరి అముకు పవిత్రుల పనికిరి
కొరిగిల్లించొ.

పాలురొ సంతోసం

2 అముకు తొమె హుదయములురె చేర్చిగిండి; అమె కాకు
అన్యాయము కొరిలానింతొ, కాకు చెరిపిలానింతొ, కాకు మోసం
కొరిలానింతొ.

3 తొముకు సిక్సావిది కలుగుసిబులి మియి యాకిరి కొయిలనీ.
మొరిజినెను గాని జీనె గానీ తొమె అమె కూడ రొమ్మంచెబులి తొమె
అమె హుదయలురె అచ్చొబులి మియి తెలుసుబులి కొయించినీనా.

4 తొమె ఉంపరె మియి బడే ధైర్యముగా కొతలాగిలించి, తొం
కోసం మియి బడే గర్వించిలించి. ఆదరనసంగరె పూరికిరి అచ్చి,
అం స్రమరె సొబ్బిటికి మించిలా బడే బూతు సంతోసం సంగరె బడే
ఆనందించిలించి.

5 అమె మాసిదోనియకు అయిలాబెల్లె అముకు కెమాత్రము విస్తాంతి
మిల్లాని. కాడుకు జెన్నెను అముకు కొస్టానె; బయిలురె కొలీనె బిత్తరె
డొరొ రొయితప్పి.

6 ఈనెను క్రుంగికిరి రొల్లబెల్లె ఆదరించిలా పురువు తీతు
అయిలవల్లరె అముకు ఆదరించిసి.

7 తీతు కొయిలా కొతనెవల్లరె, సెయ్యె తొమె అత్యభిలాసకు తొమె అంగలార్పుకు మో వినయమైకిరి తొముకు కలిగికిరి అత్యాసక్తికు అముకు కొయికుంట, సెయ్యె తొమె వినయంరె పొందిల ఆదరనవల్లరె కూడ అముకు ఆదరించిసి ఈనె మియి యింకా బూతు సంతోసించించి.

8 మియి రాసిలా పత్రిక వల్లరె తొముకు దుక్కొలోగిలవల్లరె మియ్యి బాదపొడిల నీ; మెత్తె దుక్కొ కలిగినెను సె పత్రిక తొముకు కుండె కలోమట్టుకు దుక్కొ లోగొసిబులి తెలిసిగికిరి అచ్చి.

9 తొమె దుక్కొ పొడిలీసా బులి సంతోసించిలాని గాని తొమె దుక్కొపొడికిరి మారుమాస్సు పొందిసా బులి వుంచినె సంతోసించించిలించి. క్షెంకిబుల్నె కే వినయలురె యినెను అంవల్లరె తొముకు నస్థం నాయీలాపనికిరి, పురువురొ చిత్తంరె దుక్కొపొడిసా.

10 పురువురొ చిత్తానుసారమైలా దుక్కొ రక్సనర్థమైలా మనస్సుకు కలిగించిసి; ఏ మారుమనస్సు దుక్కొముకు జొర్నైదీన్ని. ఈనె లొకొసంబందమైల దుక్కొ మొర్నొకు కలిగించుసి.

11 తొమె పురువు చిత్తం ప్రకారం పొందిలా ఏ దుక్కొ కెటువంటి జాగర్తకు కెత్తె దోసనివారనకు ప్రతివాదమునెకు కేటా ఆగ్రహముకు కెత్తె డొరొకు కేటె అబిలాసకు కెత్తె ఆసక్తికు కెత్తె ప్రతిదండముకు తొంబిత్తరె జొర్నైపించిలీసా దిగొండి. సె కార్యము గురించి సొబ్బి వినయానెరె తొమె నిర్దోసులైకిరి అచ్చి బులి రుజువు కొరిగీసా.

12 మియి తొముకు రాసిలా సె దుస్కార్యము కొరిలాట నిమిత్తము రాసిలా నీ; తావల్లరె అన్యాయము పొందిలా తా నిమిత్తమికిరి రాసిలా నీ; మోవల్లరె తొముకు ఆసక్తి పురువు అగరె తొమె మొజిరె తెలిసిగితె రాసించి.

13 ఎడకు అమె ఆదరింపబొడించొ. సెత్త నీ, అముకు ఏ ఆదరన కలిగిలాబెల్లె తీతురొ ఆత్మ తొమె సొబ్బులింకె వల్లరె విస్త్రాంతి పొందిలా వల్లరె తాకు సంతోసముకు దిక్కిరి యింకా బూతు అమె సంతోసించించొ.

14 క్యాకిరిబుల్నె మియి తా అగరె తొమె వినయమైకిరి గొప్ప కొతానె కొయినెను మియి లజ్జోపొడిలాసీ అమె యాకిరి సొబ్బిటికు తొమె సంగరె సొత్తె కొయించివో సాకరాక అమె తీతు అగరె ఏ వినయమైకిరి కొయిలా గొప్ప కొతానె సొత్తాకబులి దిగిదీసి.

15 ఈనె తొమె దొరొసంగరె వనుకుసంగరె తాకు చేర్చిగిల్లసొ బులి సెయ్యె తొమె సొబ్బిలింకె విదేయతకు జ్ఞాపకము కొరితల్లబెల్లె, బొత్తా సంబందం యింకా బూతు తొమె పక్కరె అచ్చి.

16 సొబ్బి వినయొనెరె తొమె ఉంపరె మెత్తె ధైరం అచ్చి గనక సంతోసించిలింబి.

8

క్రైస్తువుడురో సందా

1 మో జట్టుకారీనెలింకె మాసిదోనియ సంగముకు పురువురో క్రుప దీసి బులి తంకు తెలియాకొరిలింబో మిత్తె కావాలి.

2 కారిబుల్నె, తంకె బడే కొస్టావల్లరె పరీక్సంపబొడికిరి అత్యధికముగా సంతోసించినె. ఈనె తంకె నిరుపేదలులినెను తంకె దాత్రుత్వము బడే విస్తరించినె.

3 తంకె తా సామర్థ్యము వలరె నీకిరి సామర్థ్యము కన్నా బూతుగాను తా మట్టుకు సెయ్యె దీసె బులి తొముకు సొక్సం దిల్లించో.

4 పురువురో మనమానెకు సహాయం కొరిలాబిత్తరె తొమె కూడా పాలుయిలాలింకె పని తమ్మంచె బులి బ్రతిమాలిగిలింబి.

5 సెత్తెనికిరి అగరె ప్రబువుకు, పురువురో చిత్తంవల్లరె అముకు తంకును తంకె అప్పగించిగినె; యాకిరి కొరుసెబులి మియ్యి బులిగిల్లని.

6 సెడకు తీతు ఏ క్రుపకు యాకిరి పూర్వము మొదలుకొరుసో సాకరాక సెడ తొమె ప్రేమపూర్వకము సేవా కొరుబులి అమె తాకు వేడిగిల్లించో.

7 తోమె ప్రతివిసయమురె బుల్నే విస్వాసముబిత్తెరె ఉపదేసంరె జ్ఞానంరె సొబ్బి జాగర్త సంగరె తోముకు మోపక్కురొల్ల ప్రేమరె క్యేకిరి అబివుద్ది యిలీసా సాకరాక తోమె ఏ సేవా విసయంరె కూడ అబివుద్ది యిలాపని దిగిండి.

8 ఆజ్ఞపూర్వకముగా తొ సంగరె కొయిలానీ; పొదరిలింకురొ జాగర్తకు తోముకు దిగిదీలా వల్లరె తొ ప్రేమ కెత్తో యదార్దమైలాటవొ మి తెలిసిగిమండి బులిగిల్పించి.

9 తోమె అమె ప్రబువైలా యేసు క్రీస్తు క్రుపకు తెలుసుకి అచ్చినీనా? సెయ్యె పలియగలిగిలాట రొయికిరి తోమె తా దరిద్రం వల్లరె పలియరొల్లలింకె యామంచెబులి తొ నిమిత్తము దరిద్రుడు యాసి.

10 ఎడ గురించి మో ఉద్దేసం కొయిలించి; బొచ్చురొ అగరాక తోమె కే ఉపకారం కొరువురొ మొదలదీసా సెడకు ఇంకా కొరువురాక బొట్ట.

11 సెడకు ప్రారంబించితె మనస్సు తొబిత్తరె క్యాకిరి కలిగిసా సాకరాక కలిగిలాకొలిది సంపూర్తియిల పనికిరి తోమె సె పైటిసె ప్రసిద్ధంగా తోమె ఉంచినె నెరవేరుచొడి.

12 అగరె జొన్నె సిద్ధమైలా మనస్సు కలిగీకిరి రొన్నె సక్తికి మించి నీ గాని కలిగిలాకొలిదీ దిల్లట ప్రీతికరమవుసి.

13-14 పొదరిలింకు తేలికగాను తోమె బారముగాను రొమంచె బులి ఎడ కొయిలానీ గాని. ఉంచినె తోమె సప్రుద్ది తంకె అవసరముకు యింకాకెబ్బకు తంకె సప్రుద్ది తోమె అవసరముకు సహయైకిరి రొమ్మంచెబులి యాకిరి కొయిలించి యాకిరాక దీటకు సమానంగా దిగువురొ వూసి.

15 * “బూతు రొల్లటకు బూతు కిచ్చి మిగిల్లా నీ. తక్కువ రొల్లటకు తక్కువ కొదువ నీ” బులి లేకలురె రాసికిరి అచ్చి.

తీతు తా తోటి పైటిలింకె

16 తోమె విసయంరె మెత్తె కలిగిలా ఏ ఆసక్తికు తీతు హుదయంరె జొర్నెపించిలా పురువుకు స్తోత్రము.

* 8:15 నిర్గమకాండము 16.18

17 సెయ్యె మో విన్నపాముకు అంగీకరించిసి గాని తాకు విసేసాసక్తి కలిగిలా వల్లరె తా ఇష్టంచొప్పురె తొపక్కరెకు బయిలుదేరికిరి అయిలీసి.

18 ఈనె సువార్త విసయంరె సంగముల సోబ్బిటికు ప్రసిద్దియిలా తోటి పైటితాకు తాసంగరె కూడ పొడదిలించి.

19 సడనీకిరి అం ప్రబువుకు మహిమ కలిగిలా నిమిత్తము అమె సిద్దమైలా మనస్సు దిగిదీతె కోసం ఏ సహాయం కొరిలా విసయంరె పరిచారకులమైకిరి అంసంగరె కూడ సెయ్యె ప్రయానం కొరుమురొ బులి సంగమురె రొల్లాలింకె బచ్చిగీకిరి తాకు లొగ్గిచె.

20 ఈనె అమల్లా విస్తారమైలా దర్మము విసయంరె పరిచారకులమైకిరి అచ్చొ సెడకు కోసం అముంపరె కేసి తప్పు నాపొక్కిరి అమె జాగర్తగా దిగ్గీకుంటా తాకు పొడిదిల్లించొ.

21 కెడబుల్నె ప్రబువు అంకి అగరె మాత్రమకా నీ మనమనె అంకి అగరె కూడ కెడ బొల్లవొ సెడకు కోసం బొల్లకిరి ఆలోచించిలించొ.

22 ఈనె తంకె సంగరె కూడ అమె అం బయికు పొడిదిల్లించొ. బడే సంగుతులురె బడే సారులు తాకు పరీక్షించికిరి తాకు సాయం కొరితె అసక్తిగలిగిలాట బులికిరి, ఉంచినెను తొమె ఉంపరె కలిగిలా విసేసామైలా నమ్మకంవల్లరె బూతు ఆసక్తికలిగిలీసి బులికిరి తెలిసిగిలించొ.

23 తీతు విసయంరె కేసి బులి కేసన్నా పొచ్చిరిలాబెల్లె సెయ్యె మో సంగరె తల్లాటబులి తొమె విసయమురె మో జత పైటితా యీకిరి అచ్చిబులి; అమె బయినె యీలలింకె పొచ్చిరినె తంకె సంగమురె చలితె క్రీస్తు మహిమమైకిరి అచ్చెబులి మియి కొయిలించి.

24 సెడకు తంకు తొమె ప్రేమ దిగదేండి. పొదరె సంగమునె తొమె కోసం కైంకు గొప్పుగా కొయినెంతెవొ తంకు రుజువు కొరొండి.

9

క్రైస్తువు విస్వాసునెకు సహాయం కొరివురొ.

1 యూదయరె క్రైస్తువులు విస్వాసునెకు సహాయం కొరుబులికిరి తొముకు రాసివురో అవసరం నీ

2 తొమె మనస్సు సిద్ధమైకిరి అచ్చిబులి మెత్తె తెలుసు. సెడకు బొచ్చొరో దీకిరి అకయ సిద్ధపొడికిరి అచ్చి బులి కొయికిరి, మియి తొమె కోసం మాసిదోనియలింకె అగరె అతినయపొడిలించి; తొమె ఆనక్తికు దిక్కిరి బడేలింకె ప్రేరేపింపబొడిసె.

3 ఈనె తొం కోసం అమె అతినయం యే వినయములురె వ్యర్థము నాయాకిరి, మియి కొయిల పనికిరి తొమె సిద్ధముగా రొయితె ఏ విస్వాసునెకు పొడదించి.

4 తొమె నాసిద్ధపొడినె గుటకలో మాసిదోనియలింకె యీనెను మోసంగరె కూడ అయికిరి తొమె సిద్ధముగా నాతవ్వొరో దిగిలాబెల్లె, ఏ నమ్మకము కలిగికిరి రొయికిరి అమె లజ్జొపొడిలించొ; తొమె కూడ లజ్జొపొడిసొబులి యింకా కొయివురో కిర?

5 సెడకు కొతదిల్లా ప్రకారం దూంచొబులి తొమె కొయిలా దర్మము పినసారితనముగా నాదీకిరి దారాలముగ దిమ్మంచెబులి కొయికిరి, విస్వాసులింకె తొమె పక్కరకు అగరాక అయికిరి సెడకు సిద్ధం కొరితె తంకు కొయివురో అవసరం బులిగించి.

6 కుండెమట్టుకు సాయం కొరిలాట కుండె లబ్బొకు బొట్ట పొందుగుసి, బొట్ట సహాయం కొరిలాట ప్రతిజ్జొనె సెయ్యె దిమబులిగిలాట హ్రుదయం సంగరె దిమ్మంచె;

7 పురువు సంతోసం సంగరె దిలాలింకు ప్రేమించిసి.

8 ఈనె సొబ్బిటిరె కెబ్బుకు తొంబిత్తరె తొమె సర్వసమ్ముద్దిగలలింకె బొట్ట యీల ప్రతిఫైటీ కొరితె పురువు తొం ఉంపరె సొబ్బి రకాలు క్రుపకు విస్తరించిపారి.

9 ఏ వినయంరె

“సెయ్యె వెదజల్లికిరి దరిద్రునెకు దీసి

తా నీతి కెబ్బుకూ టారుసి” బులి రాసికిరి అచ్చి.

10 విత్తులాటకు విత్తోనె కైయితె కద్ది దిల్లా పురువు తొముకు యిత్తనాము దయకొరికిరి విస్తరించికిరి, తొమె ప్రతి వినయాంరె బొల్ల బగ్యముగలలింకెయితె, తొమె నీతిపలము వ్రుద్దికొరసి.

11 యాకిరి, దారాలముగ దిల్లా మనస్సు వల్లరె అం దీకిరి పురువుకు క్రుతజ్ఞతాస్తుతులు చెల్లించినె.

12 కెడబుల్నే ఏ సేవకు గురించి పరిచర్య పురువురొ మనమానె అవసరములు సహాయం కొరిలాట మాత్రమా నీకుండ, బడేలింకె పురువుకు చెల్లించిలా క్రుతజ్ఞతాస్తుతులు వల్లరె విస్తరించిలిసి.

13 కెడబుల్నే క్రీస్తుసువార్త అంగీకరించించ్చొ బులి ఒప్పిగిలాట తొమె విదేయులులైలందరె, తంకె వినయముకు సొబ్బిలింకె వినయముకు ఎత్తె సహాయం కొరిలా వల్లరె, ఏ పరిచర్య వల్లరె తొమె యోగ్యత దిగదీలావల్లరె తంకె పురువుకు మహిమ పరిచినె.

14 ఈనె తొంవుంపరె పురువు దిగదిలా అత్యధికమైలా క్రుపకు దిక్కిరి, తంకె తొమె నిమిత్తము ప్రార్థన కొరుకుంట, తొముకు దిగిమంచెబులి బడే ఆస కలిక్కిరి అచ్చె.

15 వివరించి నారిలా తా బహుమానం కోసం పురువుకు దండము.

10

పాలు తా సేవకు కాపాడిగివురొ

1 పాలుబుల్లా మియి తొం అగరె రొల్లాబెల్లె తొంబిత్తరె తగ్గించిగికిరి రొల్లా పనికిరి అగరె నీలాబెల్లె తొ సంగరె ధైర్యమునారొల్లవనా మియ్యి యేసు క్రీస్తురె రొల్లా సాత్వికముకు దీనమనస్సు వల్లరె తొముకు వేడిగిలించి.

2 దే ప్రకారము సలిలలింకె బులి అముకు గురించి కుండెలింకె కొయిగిల్లినె నీనా? సాలింకె అగరె మియి తెగించికిరి కాటిన్యము దిగిదీమంచె బులి తలించిగిల్లించి గాని మియ్యి అయిలాబెల్లె సాట కాటిన్యముకు దిగిదినాసి బులి కొరుబులి మియ్యి తొముకు బతిమాలిగిల్లించి.

3 సెడ సొత్తకా లొకొరె జీవించినెను ఈనె లొకొసారముగా కొలీనెలగ్గినింతో.

4 పురువురొ యుద్ధోపకరనములు లొకొ సంబందమైలటా నీగని. సత్తుబలం పొక్కిదిలాపని బలమురొల్లాపని అచ్చి.

5 అమె వితర్కములకు, పురువు గురించి జ్ఞానముకు అడ్డగించిలా ప్రతి ఆటంకము పొక్కుదీకిరి, ప్రతి ఆలోచనకు క్రీస్తుకు లొబడిలాపనికిరి కొరిలించొ.

6 తొమె సంపూర్ణ విదేయతకు దిగదీలాబెల్లే సొబ్బిటికు అవిదేయతకు ప్రతిదండనకొరికిరి సిద్ధపొడికిరి అచ్చి.

7 సంగతీనెకు ఉంపరె తొమె దిగిలీసా, కెనన్నాను తాకు క్రీస్తుతా బులి నమ్మకం నారొనె, సెయ్యె క్యేకిరి క్రీస్తుతా సాకరాక అమె కూడ క్రీస్తులింకె బులి తా మనస్సురె సెయ్యె బులికిరి ఆలోచించిగిమంచె.

8 పొక్కిదిత్తె నీకిరి తొముకు బందితాక ప్రబువు అముకు అనుగ్రహించిలా అదికారం కోసం మియ్యి గుటెకలో కుండె అదికముగా అతినయపొడినెను మియ్యి లజ్జొపొడిని.

9 మియ్యి రాసిలా పత్రికలు వల్లరె తొముకు డొరిపించిమంచె బులి నాదిగిదికుండ ఏ కొత కొయిలించి.

10 తా పత్రికానె గనమైలాట బలమీలాట పనికిరి అచ్చి గాని తా దే రూపమురె బలహీనుడు తా కొతానె నిచ్చరముగా అచ్చి.

11 అమె తొ అగరె నీలాబెల్లే పత్రికలు సంగరె కొతానె ప్రకారము ఈలాలింకె పనికిరి అచ్చి అగరె రొల్లబెల్ల పైటిసంగరె సాలింకె పనాక రొమ్మంచి బులి సాకిరి తంకె ఆలోచించిలీనె.

12 తాకు సెయ్యాక మెచ్చిగిల్లీసి కుండెలింకెదీ జతపరిచిగిత్తె ఈనెను తంకెది సరిదిగ్గిత్తె యీనెను అమె తెగించినింతో గాని తంకె తొసంగరె జొనె దీకిరి జొనె బచ్చిగీకిరి జొనుకు జొనె సరిదిగ్గిత్తల్లందరె గ్రహించిగినారికిరి అచ్చె.

13 అమె ఈనె స్థాయికి మించికిరి అతినయపొడినింతో ఈనె తొమె రొల్ల గా జాంక అయిమంచిబులి పురువు అముకు నప్పికిరిదిల్లా స్థాయికి లొబడికి అతినయించిలించ్చొ.

14 అమె క్రీస్తు సువార్త ప్రకటించికిరి తొంజాంక అయికిరి అచ్చి గనుక తో పక్కు నా అయిలపనా అమె మొ స్థాయి దాటికిరి జెల్లాలింకె నింతో.

15 అమె స్థాయికి మించికిరి ఎదుటలింకు ప్రయాస పలమూనెరె వొంతు రొల్లపనికిరి అతిసయపొడండి తొ విస్వాసము అబివృద్ధి యిలా కొద్ది అముకు అనుగ్రహించిలా స్థాయికి బిత్తరాక సువార్త ఇంకా విసేసముగా ప్రకటించిలించో.

16 తొ చుట్టు పక్కరె తల్లా ప్రదేసమునెకు కూడ సువార్త ప్రకటించుబులి అమె తొ మూలముగా గనపరచబొడించో బులి నిరీక్సించిలించో గాని మరి ఇంకాజొనెరె స్థాయికి చేరికిరి సిద్ధముగా తల్లా పైటి గురించి అమె అతిసయపొడినింతో.

17 “అతిసయపొడిలలింకె ప్రబువురె అతిసయపొడిమంచె బులి లేకనానె రాసికిరి అచ్చి.”

18 ప్రబువు మెచ్చిగిల్లాటాక యోగ్యుడు గాని తాకు సెయ్యె మెచ్చిగిల్లాట యోగ్యుడు నీ.

11

పాలు ఇంకా సారో అపోస్తులునె

1 కుండె వివేకముగా మియ్యి కొతలగిలానీ తొమె సహించిమంచి బులి కొరిలించి మో గురించి తొమె కిడయినెను సహించిమంచి.

2 దేవాసక్తిది తొ వలరె ఆసక్తి కలిగీకిరి అచ్చి కైంకిబుల్నె పవిత్రమైలా కన్య జొనె వొండ్రపో బుల్నె క్రీస్తుకు సమర్పించిమాసిబులి తొముకు ప్రమానం కోరించి.

3 సప్పో తా కుయుక్తి దీకిరి హవ్వకు మోసం కొల్లాపనాక తొ మనస్సునుకు చెరిపితె క్రీస్తువల్లరె రొన్నె సరలతదీకిరి పవిత్రత దీకిరి క్యాకిరి యానెను తొలిగిజూసెకివో బులి డొర్లించి.

4 కెడబుల్నె అయిలలింకె కేసెనను అమె నాప్రకటించిలాట యింకజొనె యేసు ప్రకటించినెను నినె తొమె నాకడిగిల్లలింకె ఇంకాగుటె ఆత్మకు తొమె కడిగిల్లాట తొమె నా అంగీకరించిలాట యింకా గుటె సువార్త తొమె అంగీకరించితె తొమె తా గురించి సహించివురొ బొల్టాక.

5 మియినె స్రేష్ఠమైలా ఏ “అపొస్తులు” కన్నా మియి కెత్తె మాత్రము తక్కువతా నీబులి తలంచిగిల్లించి.

6 కొతానెరె మియి ఓర్పునీలాట యినెను జ్ఞానమురె ఓర్పునీలాట నీ. ప్రతి సంగతినిరె సొబ్బిలింకె మొజిరె తొనిమిత్తము అమె సే జ్ఞానముకు దిగిదీతె అచ్చి.

7 తొముకు హెచ్చించిమంచెబులి తొముకు పురువు సువార్తకు సుచ్చరాక ప్రకటించిల్లించి మెత్తె మియి తగ్గించిగిల్లా వల్లరె పాపము కొరించినా?

8 తొముకు పరిచర్య కొరితె మియి ఏతరం సంగములు వల్లరె బొరొతొనొ కడిగీకిరి, తొముకు సాయం కొరితె నుచ్చిలాటయించి.

9 ఈనె మియి తొంపక్కరె రొల్లాబెల్లె మెత్తె అవసరం రొయికి తల్లాబెల్లె మియి కావుంపరె బారం మోపిలానీ; మాసిదోనియ దీకిరి బయినె అయికిరి మో అక్కర తీర్చినె. ప్రతి వినయంరె మియి తొముకు బారముగా నారొయికుండా జాగర్తపొడించి, యింకా అగరె జాగర్త పొడుంచి.

10 క్రీస్తు సత్యము మోబిత్తరె రొల్లావల్లరె అకయ ప్రాంతములురె మియి యాకిరి అతినయ నాపొడుకుంటా మెత్తె ఆటంకపర్చితె కా తరమునీ.

11 మియి కొయించినా తొముకు మియి ప్రేమించిలాని బులి? మియి తొముకు ప్రేమించిలించి బులి పురువుకు తెలుసు.

12 అతినయ కారనం కుజ్జిలాలింకె కే వినయమురె అతినయించిలీసోవొ, సే వినయమురె తంకెను అంవల్లరాక అచ్చెబులి దిగిదిల్లా నిమిత్తము తంకు కారనం నామిలుకుంటా పిట్టిపీతె, మియి మో,

13 కెడబుల్నే నెటాలింకె క్రీస్తురొ అపొస్తులు వేసము దరించిగిల్లాలింకెపని రొయికిరి, సొరొ అపొస్తులునె మోసం కొరిలా పైటిలింకెపనికిరి అచ్చె.

14 ఎడ ఆచర్యము నీ; సాతాను తా హల్లో దూత వేసము దరించిగిల్లినీ.

15 నెడకు తా పరిచారకులకు నీతి పరిచారకులు వేసము

దరించిగిత్తె గొప్ప సంగతిని. తంకె పైటినె వల్లరె తంకు అంతము కలుగుసి.

పాలు అపొస్తులు ఎట్టె బాదపొడిలీసి

16 మియి అవివేకి బులికిరి కేసె బులిగిత్తెనాబులి యింకా కొయిలించి. సాకిరి బులిగినె మియి కుండె అతిసయపొడిలాపనికిరి మెత్తె అవివేకియాల పనికిరాక చేర్చిగిండి.

17 మియి కొయిలాట ప్రబువు కొతా ప్రకారము కొయిలాసీ గాని యాకిరి అతిసయపొడితె ఆదారము కలిగీకిరి అవివేకిపని కొయిలించి.

18 బడేలింకె దే వినయమురె అతిసయపొడిలీసె సెడకు సాకిరి అతిసయపొడుంచి.

19 తొమె వివేకులైకిరి సంతోసం సంగరె అవివేకులకు సహించిలించి.

20 జొనె తొముకు దాస్యముకు లోపరిచినెను, జొనె తొముకు మింగిపినెను, జొనె తొముకు వసపరిచిగినెను, జొనె తాకు గొప్పకొరిగినెను, జొనె మూవుంపరె తొముకు మరినెను తొమె సహించిలిసా.

21 అమె బలహినులైకిరి రొల్లాపనికిరి అవమానంగా కొతలగిలించి. కే వినయంరె కేసినెను దైర్యము కలిగీకిరి అచ్చి, సే వినయంరె మియికూడ దైర్యము కలిగిలాట; అవివేకము పని కొతలగిలించి సుమా.

22 తంకె హెబ్రీయునె? మియి కూడ హెబ్రీ తా. తంకె ఇస్రాయేలీయులంకె నా? మియి కూడ ఇస్రాయేలీ తా. తంకె అబ్రాహాము సంతానము నా? మియి కూడ అబ్రాహాము తా.

23 తంకె క్రీస్తు పరిచారకులునెనా? బోడ తా పనికిరి కొతలగిలించి, మియి కూడ మరి బూతుగా క్రీస్తు పరిచారకుడు. మరి వినయముగా ప్రయాసపొడించి, మరి బడే సార్లు చెరసాలరె అచ్చి; అపరిమితముగా మడ్డొనె కయించి, బడే సార్లు మొర్నొ అపాయం సంగరె అచ్చి.

24 యూదునె వల్లరె పంచిబెల్లె గుటె తక్కువ ముప్పై తొమ్మిది మడ్డొనె కయించి.

25 తినిబెల్లె బడ్డినె సంగరె మరిసె. గుటెసారి పొత్తోరోనె సంగరె మరిసె; తినిబెల్లె బోయితో బంగిజేకిరి స్రమపొడించి; గుటె రత్తిదూసు సాంద్రొరె గడిపించి.

26 బడేసారులు ప్రయానములురె, వొడ్డోనె వల్లరె ఆపదలునెరె, సారోనె వల్లరె ఆపదానెరె, మో సొంత మనమానె దీకిరి ఆపదానెరె, అన్యజనులు వల్లరె ఆపదానెరె, పట్టుమురె సె,

27 ప్రయాసం సంగరె, కొస్టానెసంగరె, తరచుగా జాగరనమునె సంగరె, బొక్కో సొసొ సంగరె, తరచుగా ఉపవాసము సంగరె, సిత్తో సంగరె, దిగంబరత్వము సంగరె రోంచి, యింకా కొయిలాంచ బడేంచ అచ్చె.

28 ఎడాక నికిరి సంగము సొబ్బిటి కోసం బాద అచ్చె. ఏ బారము దినో దినో మెత్తె కలిగిలీసి.

29 కెసిנెను బలహీనుడు వూసి? మియినె బలహీనుడు నీనా? కెసిנెను తొట్టుపొడిని? మెత్తెను మంట కలిగినీనా?

30 అతినయ పొడికిరి తన్నె మియి మో బలహీనత వినయమైకిరి సంతలు కోసం అతినయపొడిలించి.

31 మియి సారొక్కొతాలగిలాని బులి కెబ్బుకు స్తుతింపబోడితల్లా అమె ప్రబువుయిలా యేసురో బోయిలా పురువు బుజ్జును.

32 దమస్కురె అరెత బుల్ల రొజా తొల్లా రొల్లా అదిపతి మెత్తె దరిగితె జొగలోదీకిరి దమస్కియుల పట్టుముకు బద్రము కొరించి.

33 సెల్లె మియి కిటికిదీ గోడ ఉంపరెదీకిరి గంపలరె వొల్లిపొడికిరి తా అత్తోదీకిరి తప్పించిగీకిరి బాజించి.

12

పాలురొ దర్శనము ఇంకా ప్రకటించివురో

1 మియి అతినయించిమాసి, ఈనె నడవల్లరె ప్రయోజనంకిచ్చి అయిని. ప్రబువు దర్శినానె ప్రత్యక్షతలు తొముకు కొయిమి.

2 క్రీస్తురొల్ల బెల్లె జొనె మనమకు తెలుసు సెయ్యె పదునాలుగు బొచ్చొరొనె అగరె తింటవో మెగొరె కొనిగిబాజి సెయ్యె దే సంగరె

కొనిగిబాజి బులి తెలిసినీ దే నీకిరి కొనిగిబాజీ బులి మెత్తె తెలిసినీ సెడ పురువుకు తెలుసు.

³ సెట మనమానె తెలుసు సెయ్యె పరదైసురె కొనిగిబాజీ వచింప సక్యము కాని కొతనె సునిసి సె కొతనె మనమనె పలికినాసి.

⁴ తా దే సంగరె కొనిగిబాజీసినా దేనికుంటా కొనిగిబాజీసినా మెత్తె తెలిసినీ. సెడ పురువుకు తెలుసు.

⁵ తా పనాట గురించి అతిసయించిలించి మో వినయము యినె మో బలహీనతరె నీకిరి యింగుట విదముగా అతిసయించిని.

⁶ అతిసయపొడితె నిచ్చయించినెను మియి సత్యంకా పలుకుంచి సెడకు అవివేకినీకిరి మోవల్లరె కేసినెను దిగిలాట యినెను మోవల్లరె సునిలాటయినెను మెత్తె మియి బూతు గనముగ

⁷ మెత్తె కలిగిలా ప్రత్యక్షతలు బహువిసేసముగా రొల్లావల్లరె మియి అత్యధికముగా హెచ్చినాపొడుకుంటా నిమిత్తము మెత్తె దేబిత్తరె గుట కొట, మియి అత్యధికముగా హెచ్చిపొకుంటా నిమిత్తము, మెత్తె నలగొటితె సాతానురొ దూతపనికిరి రొయిదీసి.

⁸ సెడ మోపక్కరెదీకిరి తొలిగిజమంచెబులి సెడ వినయంయికిరి ముమ్మారు ప్రబువుకు వేడిగిలించి.

⁹ సెడకు మో క్రుప తొత్తె చాలు; బలహీనతరె మొ సక్తి పరిపూర్ణమిలిసి బులి సెయ్యె మో సంగరె కొయిసి. సెడకు క్రీస్తు సక్తి మో ఉంపరె టారిలా వల్లరె, విసేసముగా బలహీనతలరె

¹⁰ మియి కెబ్బుకు బలహీనుడువొ సెల్లె బలవంతుడు గనక క్రీస్తు నిమిత్తము మెత్తె కలిగిలా బలహీనతలరె నిందలురె ఇబ్బందులురె హింసలురె ఉపద్రవములురె మియి సంతోసించిలించి.

పాలు కొరింతీలు కోసం చింతించివురొ

¹¹ మియి బుద్ధిహీతులుపన నటించిలించి తొమె మెత్తె బలవంతము కొరుసొ. మియి తొవల్లరె మెప్పు పొందివలిసిలాట, క్యాకిరి బుల్నే మియి కెమాత్రము యిలాటానిననా మిక్కిలి స్నేహమైలా ఏ అపొస్తులుకన్నా మియి ఏ వినయంబిత్తరె తక్కువయిలాట నీ.

12 దిగిదిల్లాపైటీనె అద్భుతానె గొప్ప పైటీనె కొరివురో వల్లరె అపొస్తులురో గుర్తునె పూర్వమైలా ఓర్పు సంగరె తొం మొజిరె సొత్తుగా దిగిపించిసి.

13 మియి తొముకు బారముగా రొన్నిబుల్లా వినయంరె తప్ప, యింకా కే వినయంరెయినె, పొదరి సంగములు కన్నా తక్కువలింకె యిసా? మియి కొరిలా ఏ అన్యాయముకు క్షమించొండి.

14 ఇదిగొ, తినెబెల్లె తొంపక్కు అయితె సిద్ధముగా అచ్చి. అయిలబెల్లె తొముకు బారముగా తన్ని. మియి సొత్తుకు నీగాని తొమెకాక మియి కొరిలించి. పిల్లనె మాబోనె కోసం నీగని బో మాక పిల్లనె కోసం ఆస్తి కూర్చిమంచెనీనా.

15 సెడకు మెత్తె కలిగిల సొబ్బిటికి తొం ఆత్మానె కోసం బడే సంతోసముగా కర్చు కొరిమి; మియి తొం కోసమాక కర్చుయిజిమి మియి తొముకు కెత్తె బూతు ప్రేమించిలించొ సెత్తె తక్కువుగా మెత్తె ప్రేమించువొనా?

16 సెడ సాకిరి తమ్మురొండి. మియి తొముకు బారముగా నీగాని, యుక్తియిలట పనికిరి తొముకు తొత్తె మాయకొరికిరి జింకిగిల్లించి బులి కొయిగిల్లినె కీవొ.

17 మియి తొమె పక్కు పొడదిలాలింకె బిత్తరె కాసంగరె యినెను తొముకు మాయకొరించినా.

18 తొంపక్కు జేతందుకు తీతుకు హెచ్చరించికిరి తా సంగరె కూడ గుట బయికు పొడదించి తీతు తొముకు మోసం కొరికిరి తొంపక్కురె కిరయినెను జింకిగిచ్చినా? అమె గుట ఆత్మరె గుట పనికిరి చలిజెల్లానింతొనా?

19 మో జట్టుకారీనెలింకె అమె ఎత్తెజాంక అమె వినయమైకిరి తొముకు సమాదానం కొయిలించొ బులి తొముకు తొసిలీసికీవొ. పురువు అగరాక క్రీస్తురె కొతాలగిలించొ; ఇస్టమైలలింకె తొమె బొల్లె రొమ్మంచెబులి తొం కోసం ఎడానల్లా కొయిలించొ.

20 క్షెంకిబుల్నే మియి అయిలాబెల్లె తొమె మెత్తె ఇస్టమైలాలింకె పనికిరి తన్నారొ కీవొబులి, మియి తొముకు ఇస్టమైలా పనికిరి తన్నికీవొ

యింకా కొలీనె అసూయ క్రోదము కక్సానె కొండెమునె గుసగుసానె ఉప్పొంగువురొ అల్లరినె తాసె కిరవొ బులి,

²¹ మియి యింకా అయిలాబెల్లె మో పురువు తొమ్మెజిరె మెత్తె సన్నిట కొరువొ బులి అగరె పాపం కొరికిరి తంకె జరిగించిలా అపవిత్రత జారత్వము పోకిరి పైటినె నిమిత్తము పొచ్చుకు బుల్లికిరి నాపొందిలా బడేలింకె గురించి దుక్కొపొడివురొ అయివొకివొబులి డొరిజిలించి.

13

ఆకరు హెచ్చిరిక

¹ * ఎ తింటసారి మియి తొముకు పక్కు అయిలించి దీలింకె తిల్లింకె సాక్సీనె తుండొరె ప్రతి కొతానె నిర్దారన వుసి యడ లేకనానెరె రాసికిరి అచ్చి.

² మియి అగరె కొయించి; మియి ఉంచినె తొపక్క రె నీనెను దీటొసారి తొపక్కరె రొల్లాపనికిరి, అగరెదీకిరి పాపము కొరితల్లాలింకు మిగిల్లలింకె సొబ్బిలింకు అగరె కొయిలాట కిరబుల్వే, మియి బుల్లికిరి అయిలబెల్లె కనికరము దిగిదినీ.

³ క్రీస్తు మోదీకిరి కొతలగిలిసిబులి రుజువు కోరిలిసానా? సెయ్యె తొవుంపరె బలహినుడు నీ గానీ, తొవుంపరె సక్తిమంతుడైయికిరి అచ్చి.

⁴ బలహీనత వల్లరె సెయ్యె సిలువ పొగిసెగానీ, పురువు సక్తి వల్లరె జిలీసి. సాకరాక మియ్యె క్రీస్తురె గుటె యాలా కారనంగా బలహీనతరె అచ్చి సాకరాక తొత్తె సేవా కొరితె పురువు సక్తివలరె మియ్యె జివించిలించి

⁵ తొమె విస్వాసముగల్గాలింకె పనికిరి అచ్చెనా నీనా తొముకు తొమ్మాక సోదించిగికిరి దిగండి; తొముకు తొమ్మాక పరిక్కించిగిండి; తొమె బ్రష్టునె నీనె యేసుక్రీస్తు తొబిత్తరె అచ్చిబులి తొమె కోసం తొమ్మాక బుజ్జినింతొనా?

* 13:1 ద్వితీయాపదేశకాండము 19 .15

6 అమె బ్రస్తునె నీబులి తొమె తెలిసిగుంచొబులి మో నమ్మకం.

7 తొమె కే చెడ్డపైటి నాకొరుకుండ రొమ్మంచెబులి పురువుకు ప్రార్థించిలించి. అమె యోగ్యునెపనికిరి దిగదీమంచెబులి నీ కాని, అమె అయోగ్యులుపనికిరి నాదిగదిల్ల తొమె బొల్లాక కొరిమంచెబులి అం ఉద్దేసం.

8 అమె కేవలం సొత్త కోసం గానీ సొత్తకు వేతిరెకంగ కిచ్చి కొరినారొ.

9 అమె బలహీనులిన్నెను తొమె బలవంతులులికిరి రొన్నె సంతోసించిమో. ఎడవల్లరె, బుల్నే సంపూర్నునె యిమంచెబులి ప్రార్థించిలించి.

10 సెడకు మియి దూరగా రొల్లబేల్లకా ఏ సంగితిసె రాసిలించి. సాకిరి కోరినె మియి అయిలాబెల్లె మో అదికారం ఉపయోగించిలబిత్తరె కాటిన్యత దిగదిల్లా అవసరం రొన్ని. ఏ అదికారం ప్రబువు తొముకు పొక్కుదిత్తె నికిరి, బందిత్తె దీసి.

ఆకరు బొల్ల కొతానె

11 ఆకరుకు, అన్నబయినె అప్పబొయినీనె, సంతోసించొండి! పునరుద్దన కోసం పాటుపొడొండి. ప్రోత్సహం పొందిగొండి. గుట్టె మనస్సు సంగరె రొండి. సాంతి సంగరె జిండి. ప్రేమ, సమాదానం పురువు తొనంగరె రొసి.

12 పవిత్రమైల చుమ్మా లొగ్గికిరి జొనుకు జొనె దండము కొయిగొండి.

13 పరిసుద్దులల్లా తొముకు వందనమునె కొయిలీసె,

14 †ప్రబువైలా యేసు క్రీస్తు క్రుప పురువురొ ప్రేమ పరిసుద్దాత్మరొ సహవాసము తొముకల్లా తోడైకిరి రొమ్మంచె.

† 13:14 పరిసుద్దగ్రందము, నూ సెట, గ్రీకు రె 12, 13 తింట పుస్తకం రె రాసికిరి అచ్చి

xxx

సాత్త్వ పురుషురొ పవిత్రొ కొత
The Holy Bible in the Reli language of India: సాత్త్వ
పురుషురొ పవిత్రొ కొత (Bible)

copyright © 2023 The Word for the World International and Relli Translation Samiti, Vishagapatnam, Andra Pradesh

Language: Relli (Reli)

Contributor: The Word for the World South Asia

సాత్త్వ పురుషురొ పవిత్రొ కొత
నో నిబంధన, 2023

The New Testament in Relli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025

46416fd4-e5d1-555f-9e24-8bbc94e50bd9